

"Te despues na Monchi, "cara di steelband di Tanki Leendert"

Te ultimo tempo, ora papia di steelband di Tanki Leendert, e number cu ta bin dilanti continuamente tabata di Monchi Danies, e persona cu tabata conoci como **"e cara di steelband"** di Tanki Leendert.

Ora papia di steelband na Tanki Leendert tur hende ta lubida tur otro Danies, pasobra ta e number di Monchi ta bin dilanti na prome lugar, y despues tur otro por sigui.

Pa carnaval 50 por a tende comentarionan cu **"Danies"** ta bolbe cu su steelband, y e comentario aki, aunke e tabata un deseo di hopi, no ta wordo realiza, pasobra e **"Danies"** cu tur hende lo kiermeen tabata **"Monchi"**.

Awe tardi den misa Santa Anna na Ncord, familiaran, amigonan y amiganan y conocirnan por mira e cara aki pa ultimo biaha, pero cu wowonan cera den caha.

Awe Narciso Simon **"Monchi"** Danies ta ser hiba pa su ultimo lugar di sosiego.

Riba nos isla, ta hopi hende a conoce Monchi, como chofer pa mas di 30 aña cu gobierno, chofer di Gezaghhebbber(nan) cu nos isla a conoce den e periodo di 32 aña cu el a traha pa gobierno y te na ultimo tabata conoci, no como e chofer di diputadonan, principalmente como chofer di gezaghhebbber, ni como Commies, cu tabata su rango, pero como **"bode"** Danies.

Monchi, ex futbolista cu tabata un estelar di Tropical, y varios otro equipo; cu a participa den weganan tanto local como internacional; cu a carga Copa Antiyano, y cu despues a crea number internacionalmente como referee.

Monchi, den su uniform preto carson cortico, tabata un di e prome nan riba nos isla cu badge di referee di FIFA y tabata conoci pa su trabao grandi como arbitro internacional y local.

E mester a bandona e trabao aki debi na problema na enkel cu el a



kibra y cu a keda molesti'e.

Riba tereno musical for di mey mey di añanan 60 e tabata conoci caba como tocador di steelband, cuminsando cu su **"hub"** cu semper e tabata tin den auto pa cay aden unda cu ta, y a toca cu Young Stars hopi tempo.

Despues na cas el a forma e steelband cu a bira conoci como **Tanki Leendert Stars** y tambe **Little Stars**.

E tabata e lider despues di **Happy Islanders** cu na 3 ocasion a titula campeon den final di añanan 70.

Steelband cu a graba cassette y CD y cu tabata tin e wals **"Metraya"** na di 30 lugar den e mihor 100 nan di Aruba.

Despues el a yuda Young Stars na varios ocasion cu tocanan na hotelnan, entre otro na Americana y Tamarijn.

El a biaha cu Happy Islanders pa Corsow, Venezuela na varios ocasion, na Santo Domingo pa carnaval di Sto. domingo y na Colombia.

Esnan cu a conoce Monchi sa cu semper e tabata kier tur cos pa bay bon.

E semper tabata directo riba loke e kier y directo tambe den locual e tin di bisa o papia.

E nunca tabata conoci como persona di **"beat around the bush"**, manera sa bisa na ingles.

E no tabata **"balia rond di asuntonan"**, sino ta bin directamente afo, imponiendo respet.

Respet y disciplina cu el a impone tambe na cas unda su familia tabata bin na prome lugar.

Monchi, cu nunca tabata kier scucha **"laga pa despues"** o **"laga pa mañan"**.

E **"despues"** ta keda pa despues di awe tardi, caminda cu tur hende lo bisa: **"Monchi danki, sosega na paz y TE DESPUES"**.

Juby Naar